

Inzko: Koalicije u svrhu rezultata, a ne raspodjele pozicija



Jedini način da se okreće nova stranica nakon osam godina stagnacije u Bosni i Hercegovini jeste da vlade na svim nivoima raskinu sa starom praksom i počnu provoditi prijeko potrebne reforme, izjavio je visoki predstavnik Inzko danas u Luksemburgu, gdje se sastao sa ministrom vanjskih i evropskih poslova ove zemlje Jeanom Asselbornom.

„Građani Bosne i Hercegovine i međunarodna zajednica u potpunosti se slažu oko jedne vrlo jednostavne stvari: očekujemo fundamentalnu promjenu u načinu na koji se vodi politika u ovoj zemlji. Politički lideri ne smiju gajiti nikakve iluzije da će dosadašnji način rada biti prihvatljiv“, rekao je Inzko.

Izrazivši žaljenje što vlade na državnom i federalnom nivou još uvijek nisu formirane, više od pet mjeseci nakon općih izbora u BiH, visoki predstavnik je rekao da političke stranke, kada budu razmatrale raspodjelu posla unutar novih vlada, treba da usmjere energiju na konkretne mjere koje će unaprijediti život građana: „Koalicijski pregovori moraju sadržavati više od puke raspodjele pozicija – građani očekuju da čuju od novih vlasti kako namjeravaju ispuniti obećanja data na izborima. To do sada nismo čuli“.

Vladavina prava – što podrazumijeva puno poštivanje Daytonskog

mirovnog sporazuma – provođenje ekonomskih reformi i borba protiv korupcije moraju biti neki od ključnih prioriteta novih vlasti, rekao je visoki predstavnik. OHR, Evropska unija i drugi međunarodni akteri, sa mandatima koji se međusobno dopunjaju, prisutni su na terenu kako bi pomogli zemlji da odgovori na te izazove.

„Ovo je vrijeme da ponovimo svoju opredijeljenost za ujedinjenu i reintegriranu Bosnu i Hercegovinu, tako što ćemo podržati provođenje dubokih i ponekad bolnih promjena koje su neophodne da bi zemlja postala funkcionalan, stabilan i prosperitetan član evropske porodice“, zaključio je visoki predstavnik.

Luksemburg će preuzeti predsjedavanje Vijećem Evropske unije 1. jula 2015. Jean Asselborn, koji je ministar vanjskih poslova od 2004. godine, najduže obavlja tu funkciju od svih ministara vanjskih poslova Evropske unije.